



VINNUEFTIRLITIÐ

Ákvörðun nr. 2/2018

Álagning dagsekta á Handverkshúsið ehf. vegna vanrækslu á að fara eftir fyrirmælum Vinnueftirlits ríkisins

I. Málavextir

Í reglubundinni skoðun eftirlitsmanns Vinnueftirlits ríkisins til Handverkshússins ehf., kt. 630306-0190 að Dalvegi 10-14, 201 Kópavogi, þann 23. júlí 2015, voru veitt eftirfarandi fyrirmæli í eftirlitsskýrslu B 103582:

- Að gera skyldi skriflega áætlun um öryggi og heilbrigði á vinnustað.
- Að í áhættumati skyldi fara yfir skipulag og stærð verslunarinnar með tilliti til þess hvort einn starfsmaður gæti séð um að sinna viðskiptavinum, fylla á hillur og annað sem er í starfslýsingu starfsmanna.
- Að gera skyldi ráðstafanir til að bæta aðstöðu við afgreiðsluborð til að draga úr eða koma í veg fyrir að starfsmaður fái álagseinkenni í stoðkerfi.

Voru fyrirmælin gefin á grundvelli 21. gr. og 26. gr. reglugerðar nr. 920/2006 um skipulag og framkvæmd vinnuverndarstarfs á vinnustöðum, 1. og 5. mgr. 3. gr. reglna nr. 581/1995 um húsnæði vinnustaða og 3. gr. og 4. gr. reglna nr. 498/1994 um skjávinnu Í framangreindum ákvörðunum Vinnueftirlits ríkisins kom fram að fyrirtækið skyldi tilkynna Vinnueftirliti ríkisins um það þegar úrbótum væri lokið.

Fyrirmælin voru ítrekuð tvisvar sinnum með bréfum sem Vinnueftirlit ríkisins sendi Handverkshúsinu ehf., dags. 8. febrúar 2016 og 7. júní 2016. Þrátt fyrir þessar ítrekanir þá var ekki farið eftir þessum fyrirmælum Vinnueftirlits ríkisins.

Með bréfi, dags. 31. janúar 2018, var athygli vakin á rétti aðila skv. 13. gr. stjórnslulaga nr. 37/1993 að tjá sig um efni máls áður en ákvörðun yrði tekin í því. Kom fram í bréfinu að Vinnueftirlit ríkisins væri að íhuga að leggja dagsektir á Handverkshúsið ehf. þar sem það hafði ekki farið að ofangreindum fyrirmælum stofnunarinnar. Handverkshúsinu ehf. var veitt 14 daga frestur til að koma að andmælum áður en Vinnueftirlit ríkisins tæki ákvörðun um hvort leggja skyldi á fyrirtækið dagsektir, sbr. heimild í 87. gr. laga nr. 46/1980 um aðbúnað, hollustuhætti og öryggi á vinnustöðum, með síðari breytingum. Þrátt fyrir framangreint var ekki farið að fyrirmælum Vinnueftirlitsins.

II. Niðurstaða

Samkvæmt 1. gr. laga nr. 46/1980 um aðbúnað, hollustuhætti og öryggi á vinnustöðum, með síðari breytingum er það tilgangur laganna að tryggja öruggt og heilsusamlegt starfsumhverfi. Samkvæmt 75. gr. laga nr. 46/1980 er það hlutverk Vinnueftirlits ríkisins að hafa eftirlit með lögnum. Í lögum um aðbúnað, hollustuhætti og öryggi á vinnustöðum eru mörg almenn efnisákvæði er kveða á um hvernig vinnuumhverfi starfsmanna skuli háttáð og í reglum og reglugerðum sem settar hafa verið á grundvelli þeirra eru ákvæði laganna nánar útfærð.

Samkvæmt 13. gr. laga nr. 46/1980 er það skylda atvinnurekanda að tryggja að gætt sé fyllsta öryggis og góðs aðbúnaðar og hollustuhátta á vinnustað. Skv. 37. gr., 42. gr. og 46. gr. laga nr. 46/1980 skal fylgja fyrirmælum Vinnueftirlits ríkisins að því er varðar aðbúnað, hollustuhætti og öryggi á vinnustöðum. Í 6. mgr. 82. gr. laga nr. 46/1980 er kveðið á um það að ef Vinnueftirlit ríkisins beinir skriflegum fyrirmælum til atvinnurekanda um úrbætur á vinnustað ber viðkomandi atvinnurekanda eða fulltrúa hans að tilkynna stofnuninni formlega, svo sem bréflega eða með rafrænum hætti, þegar umræddum úrbótum er lokið á vinnustaðnum. Þar sem Handverkshúsið ehf. hefur ekki farið að framangreindum fyrirmælum Vinnueftirlits ríkisins þrátt fyrir að fyrirmælin hafi verið ítrekuð og veittir hafa verið margir frestir þá hefur stofnunin tekið þá ákvörðun að leggja á Handverkshúsið ehf. dagsektir, sbr. heimild í 87. gr. laga nr. 46/1980, þangað til fyrirtækið uppfyllir lagaskyldur sínar, en sú grein kveður á um það, að ef ákvæði laga nr. 46/1980 eða reglna sem settar eru með stoð í þeim eru brotin og ekki er farið eftir ákvörðun Vinnueftirlits ríkisins á grundvelli þeirra þá getur stofnunin ákveðið að sá eða þeir sem ákvörðun beinist að greiði dagsektir þar til farið verður að henni.

Samkvæmt gögnum Vinnueftirlits ríkisins þá starfa 4 starfsmenn hjá Handverkshúsinu ehf.

III. Ákvörðunarorð

„Handverkshúsið ehf., kt. 630306-0190, hefur brotið gegn 21. gr. og 26. gr. reglugerðar nr. 920/2006 um skipulag og framkvæmd vinnuverndarstarfs á vinnustöðum, 1. og 5. mgr. 3. gr. reglna nr. 581/1995 um húsnæði vinnustaða og 3. gr. og 4. gr. reglna nr. 498/1994 um skjávinnu.

Af þeim sökum og með heimild í 87. gr. laga nr. 46/1980 um aðbúnað, hollustuhætti og öryggi á vinnustöðum, með síðari breytingum, leggur Vinnueftirlit ríkisins dagsektir á Handverkshúsið ehf. Skal fyrirtækið greiða kr. 20.000 á dag frá og með næsta degi eftir að Handverkshúsinu ehf. var tilkynnt sannanlega um þennan úrskurð og þar til það hefur tilkynnt um úrbætur til Vinnueftirlits ríkisins í samræmi við ákvörðun Vinnueftirlits ríkisins frá 23. júlí 2015.”

Vinnueftirlit ríkisins